



KEMENTERIAN PENGANGKUTAN MALAYSIA

**TEKS UCAPAN YB MENTERI PENGANGKUTAN
MAJLIS PERASMIAN KEMUDAHAN PARK 'N RIDE SUNGAI BESI
PADA 8 FEBRUARI 2013 (JUMAAT)
JAM 11.30 PAGI**

Salam Sejahtera dan Salam Satu Malaysia.

Yang Berhormat Dato' Raja Nong Chik Dato' Raja Zainal Abidin,
Menteri Wilayah Persekutuan dan Kesejahteraan Bandar,

Yang Berbahagia Datuk Adnan Hj. Md. Ikhsan,
Ketua Setiausaha Kementerian Wilayah Persekutuan & Kesejahteraan
Bandar,

Yang Berusaha Puan Ruhaizah Mohamed Rashid,
Timbalan Ketua Setiausaha (Perancangan), Kementerian Pengangkutan,

Tan Sri-Tan Sri, Datuk-Datuk, Datin-Datin, Tuan-Tuan dan Puan-Puan,

Pertama sekali, izinkan saya mengambil kesempatan ini untuk
mengucapkan tahniah kepada pasukan NKRA UPT atas kejayaan
menyempurnakan projek Park 'n Ride Stesen LRT Sungai Besi.

Hadirin yang dihormati sekalian,

Kerajaan Barisan Nasional sememangnya amat memberi perhatian kepada kebajikan dan kesejahteraan rakyat dalam semua aspek. Justeru itu, pada bulan Julai 2009, Yang Amat Berhormat Dato' Sri Mohd Najib bin Tun Haji Abdul Razak, Perdana Menteri Malaysia telah mengumumkan 7 bidang keberhasilan utama atau National Key Results Area (NKRA) bertujuan untuk memastikan kepentingan rakyat dijaga dengan sebaiknya di bawah Program Transformasi Kerajaan.

Salah satu daripada 7 Bidang Keberhasilan Utama (NKRA) yang diberi perhatian adalah meningkatkan mutu pengangkutan awam di Lembah Klang yang menjamin penyediaan kemudahan-kemudahan bagi memberi keselesaan kepada rakyat. Melalui NKRA Pengangkutan Awam ini telah timbul idea untuk mewujudkan kemudahan "Park 'n Ride" di Stesen LRT Sungai Besi.

Pemilihan Stesen LRT Sungai Besi adalah berikutan kemudahan tempat letak kereta yang sedia ada hanya boleh menampung 88 buah kereta ini sudah tidak dapat menampung bilangan pengguna LRT yang kian memberi kepercayaan kepada pengangkutan awam, khususnya di Stesen LRT Sungai Besi. Berdasarkan rekod, purata bilangan pengguna perkhidmatan LRT Laluan Ampang setiap hari pada tahun 2012 adalah seramai 170,000 orang, di mana kira-kira 15,000 orang pengguna menggunakan Stesen LRT Sungai Besi. Bilangan pengguna harian di Stesen LRT Sungai Besi juga menunjukkan trend peningkatan dengan rekod purata kenaikan sebanyak 20% setiap tahun. Stesen LRT Sungai Besi merupakan stesen LRT ke 11 dari keseluruhan 25 stesen LRT Laluan Ampang yang merekodkan jumlah pengguna tertinggi harian.

Hadirin sekalian,

Kemudahan Park 'n Ride Sungai Besi ini akan memberikan kemudahan secara langsung kepada pengguna perkhidmatan LRT Laluan Ampang, khususnya pengguna di Stesen LRT Sungai Besi.

Kemudahan yang setinggi 3 tingkat ini dilengkapi dengan 220 petak letak kereta, lif, kamera keselamatan litar tertutup atau CCTV, tandas dan juga laluan pejalan kaki berbumbung yang menghubungkan Stesen LRT Sungai Besi. Kemudahan Park 'n Ride Sungai Besi ini juga turut dilengkapi dengan gerai makanan yang secara langsung akan menghidupkan suasana di sini. Sebagai makluman tambahan, selain daripada kemudahan Park 'n Ride Sungai Besi ini, Kementerian Pengangkutan di bawah inisiatif NKRA turut membina lebih dari 20 kemudahan Park 'n Ride di stesen-stesen LRT, KTM Komuter dan ERL yang secara keseluruhannya akan menambah kira-kira 10,000 petak letak kereta untuk kemudahan pengguna pengangkutan awam di Lembah Kelang.

Hadirin yang dihormati sekalian,

Perasmian kemudahan Park 'n Ride Sungai Besi pada hari ini merupakan satu lagi bukti komitmen berterusan Kerajaan Barisan Nasional dalam meningkatkan mutu perkhidmatan pengangkutan awam dan seterusnya merangsang orang ramai untuk menggunakan pengangkutan awam, khususnya perkhidmatan pengangkutan rel.

Berdasarkan rekod terkini, pelaksanaan inisiatif-inisiatif NKRA-UPT telah mula membuahkan hasil di mana purata bilangan pengguna pengangkutan rel bagi laluan Ampang setiap hari pada tahun 2012 adalah sebanyak 170,000 orang pengguna, meningkat sebanyak 6.25% berbanding 160,000 orang pengguna setiap hari pada tahun 2011. Secara keseluruhannya, bilangan pengguna pengangkutan awam pada waktu puncak 7 pagi hingga 9 pagi setiap hari untuk tahun 2012 telah mencapai lebih kurang 335,000 orang, atau peningkatan sebanyak 4% berbanding 320 ribu orang setiap hari pada tahun 2011.

Ini menunjukkan perkhidmaan pengangkutan awam di Lembah Klang telah menjadi mod pilihan orang ramai dan adalah menjadi harapan ianya akan menjadi pilihan pengguna pada masa hadapan dengan langkah-langkah yang sedang diambil oleh Kerajaan Barisan Nasional.

Hadirin sekalian,

Di kesempatan ini jua, sekali lagi saya merakamkan penghargaan dan terima kasih kepada semua pihak terutamanya Dewan Bandaraya Kuala Lumpur atau DBKL dan juga Kementerian Wilayah Persekutuan & Kesejahteraan Bandar yang terlibat secara langsung dalam menjayakan pembinaan dan pengoperasian kemudahan Park 'n Ride Sungai Besi ini. Ribuan terima kasih diucapkan sekali lagi kepada Yang Berhormat Dato' Raja Nong Chik Dato' Raja Zainal Abidin, Menteri Wilayah Persekutuan dan Kesejahteraan Bandar kerana bersama-sama Kementerian Pengangkutan dalam menjayakan agenda nasional NKRA Pengangkutan Awam ini.

Sekian, terima kasih.